


ALAHADY FAHA 20 MANDAVANTAONA - A



NY OLOMBELONA REHETRA NO KENDREN'ANDRIAMANITRA HIDITRA AO AMIN'NY FANJAKANY

Ry Kristianina havana, raha nibanjina an'i Masina Maria nampakarina amim-boninahitra vatana sy fanahy any an-danitra isika tamin'ny 15 aogositra ary dia faly sy ravo satria nisy havantsika tafita. Izany koa ny miandry antsika raha miombona amin'Andriamanitra isika, raha mivelona tahaka ny niveloman'i Masina Maria ny finoana ary izy ny ohatra voalohany ho antsika amin'ny fiombonam-po

tanteraka amin'i Kristy. Amin'izao Alahady faha 20 mandavantaona dia azo lazaina fa mbola manohy an'izany fifaliana sy firavoana izany isika satria ireo vakiteny izay arosan'ny Eglizy androany dia handalinantsika ny finoana ka hahatonga antsika Kristy mpiara-belona amin'ireo manodidina antsika dia ny fiainana ilay toetra lehibe

anankiray izay hita ao amin'i Masina Maria ka asongadin'ireo vakiteny telo ireo ka mahatonga hafaliana sy fanantenana ho antsika satria ny olombelona rehetra no kendren'Andriamanitra hiditra ao amin'ny fanjakany.

Raha nahary antsika tokoa manko Andriamanitra dia nahary antsika hitovy endrika aminy, ka ny vocationtsika dia ho sambatra miaraka aminy isika. Ny voninahitr'Andriamanitra dia isika ho velona sy sambatra miaraka Aminy. Izany tokoa no tian'ny Eglizy amin'ny alalan'ireo vakiteny telo aroso amintsika sy alalinintsika amin'izao Alahady faha 20 mandavantaona izao.

Amin'ny vakiteny voalohany Iz 56, amin'ny fizarana fahatelo rehefa miverina tokoa ny vahoakan'Andriamanitra voasesitany avy any Babilona ho an'ny Jerosalema, nanovo hafaliana sy fanantenana raha mifikitra amin'ny Tompo. Ny famonjena sy ny fahamarinana dia ho an'ny vahoaka tokoa raha mifikitra amin'ny Tompo, fampianarana lehibe aroso amintsika izany.

Vakiteny I : Iz. 56, 1. 6-7

Tononkira : Salamo 8

Vakiteny II : Rôm 11, 13-15. 29-32

Evanjely : Mt. 15, 21-28

Raha tiantsika ny hiombona amin'i Masina Maria amin'ny voninahitr'Andriamanitra ao amin'ny voninahitry ny Trinite masina dia mananatra antsika Izaia mpaminany tahaka ny nanarany ny vahoaka tamin'ny androny : *"Tandrema ny hitsiny ary araho ny rariny, fa efa akaiky ny famonjeko, ary efa hiseho ny fahamarinako. Ary ny hafa firenena izay mifikitra amin'ny Tompo: mba hanompo Azy sy ho tia ny Anarany, ary ho mpanompony; izay rehetra mitandrina ny sabata fa tsy mandika azy, sy miraikitra mafy amin'ny fanekeko, dia hoentiko ao an-tendrombohitro masina, sy hampifaliako ao an-tranoko fivavahana, hankasitrahina eo ambony ôtely ny sorony dorana aman-tsorony: fa ny tranoko hatao hoe: "Trano fivavahana ho an'ny firenena rehetra".*

Inona ary ny toetra tokony ananantsika ho entintsika miroso amin'ny maha Kristy mpiara-belona amin'ireo manodidina antsika ? dia ilay toetra ambaran'ny Evanjely, toetran'ilay vehivay kananeanina izay fantantsika fa tsy anisan'ny vahoaka jody fa nahatoky feno fanentrentena ary tao anatin'ny faharetana ka nahatolagaga an'i Jesoa ny finoany.

Antitranterin'i Jesoa fa lehibe ny finoan'ilay ravehivavy ka nilaza izy hoe aoka ho tanteraka aminao araka ny fanirianao.

Ry Kristianina havana, ny finoana izay midika fitokisana amin'Andriamanitra, izay nahatonga an'ity vehivavy kananeanina na dia voahilikilika aza nefa noho ny finoana dia nahasahy nijoro nanambara izany tamin'i Jesoa izy : *"Fa nanatona ihany ravehivavy ka niankohoka teo anatrehany, ary nanao hoe: "Tompo ô, vonjeo aho!" Nefa novaliany hoe: "Tsy mety raha ny mofon-jaza no alaina ka atsipy ho an'ny amboa".* Tsy nanda ny fampianaran'i Jesoa ilay ravehivavy fa noho ny fahasahiany dia hoy ravehivavy: *"Marina izany, Tompoko, nefa ny amboakely mba mihinana ny sombintsombiny latsaka avy amin'ny latabatry ny tompony ihany".*

Tsy misaraka amin'ny finoana ny fahasahiana satria manambara martiry vavolombelona, nampitolagaga an'i Jesoa ny valin-tenin'ilay vehivavy, fantatr'i Jesoa izany fa tiany hampibaribary amintsika fa natao ho an'olona rehetra ny finoana fa tsy ho an'olona vitsivitsy fotsiny.

Raha mandray ny fanomezan'Andriamanitra isika ka mamaly azy dia izany ny finoana ry Kristianina havana sy ho antsika rehetra mamaky izao fampianarana izao : fantaro fa fanomezan'Andriamanitra ny finoana, izay no talahoantsika isanandro, ireo Apôstoly aza izay tena akaiky tamin'i Jesoa isan'andro mbola nilaza hoe : ampitombo ny finoanay, mainka va isika ? Izany finoana mitombo toy ny lalivay mampitombo ny fiainantsika izay dia fampitrahaofana ny finoana sy ny fiainana andavanandro. Mino sy mahatoky isika fa ity vehivavy voalaza amin'ny Evanjely ity raha sahy nanatona an'i Jesoa dia efa nahay nampitraotra ny finoana sy ny fiainana andavanandro satria tsy misaraka ny finoana sy ny fanentrentena izay hita miharihary tamin'ny toetran'ilay vehivavy, nahafoy tanteraka izy. Izany no nanomezan'i Jesoa azy ny fahasoavana : *"Dia namaly i Jesoa ka nanao taminy hoe: "Ravehivavy, lehibe ny finoanao, aoka ho tanteraka aminao araka izay irinao". Dia sitrana tamin'izany ora izany ihany ny zanany vavy".*

Manasitrana antsika ny finoantsika, inona moa ny fanasitrana ? ny fiombonana amin'Andriamanitra, izany no fanasitrana noraisin'ity fianakaviana dia ravehivavy sy ny zanany, nilamina ny fiainana, sitrana ny zanany , ao anaty fiadanan'Andriamaitra izy.

Izany koa no faniriansika dia ny mba ho ao anatin'ny fiadanana sy ny filaminana koa ny eglizy kelintsika, dia ny fianakaviansika, ny fiaraha-monintsika, ny firenentsika, ny tanindrazantsika.

Antitranterin'i Md Paoly fa raha monina ao amin'ny fiadanan'i Kristy isika, raha mifikitra amin'ny finoana isika dia omen'Andriamanitra ny famindrampony.

Samy nomen'Andriamanitra ny famindrampony avokoa izy ireo, natao ho an'olon-drehetra ny finoana sy ny famonjena. Ny lahatr'Andriamanitra dia isika hiadana ao Aminy ka iriny hiditra ao amin'ny fanjakany isika rehetra.

Enga anie hiroso lalindalina kokoa isika amin'ny finoana, ho sahy hijoro vavolombelona isika eo amin'ny fiainantsika andavanandro.

Ry Jesoa Tompo ô, antitranterinao amin'ny fanaovanao famantarana lehibe mikasika ani'ty ilay vehivavy kananeanina ity fa tianao ho eo anivonao tokoa izahay, nokendrenao ho iray fianakaviana aminao izahay, enga anie ny famidram-ponao hanenika ny fiainanay manontolo hahafahanay hiroso amin'ny lalindalina kokoa amin'ny finoana.

Hitanao ry Jesoa zokinay ny ezaka ataon'ny Eglizy amin'izao andro misy fanenjehana ny Eglizy izao, hitanao ny ataon'ny Papa, ny ataon'ireo Kristianina tsotra ihany koa, enga anie hiasa izahay hanasoa an'ireo mandodidina anay, ho tanteraka tokoa ilay nofinofinay tamin'ny JMJ ho taranaka manorina izahay fa tsy mandrava ary ho sambatra izahay satria handova ny tany tranobe iombonana dia ny tany onenany ity. Amen

Mompera Arseveka Mgr Benjamin Ramaroson